

四庫全書

集部

欽定四庫全書

鄱陽五家集卷十二

鄱陽史簡編

明劉炳春雨軒集一

五言絕句

聞魯志敏訃音

故國猶傳箭中原未解戎遙聞故人死雙淚落秋風

玉階怨

風開翡翠簾霜滿芙蓉葉欲上象牙牀鴛鴦冷還怯

題蘇武牧羊圖

墮蕃十九年坐卧持漢節歸時兩鬢斑疑是天邊雪

七言絕句

西湖獨酌偶

荷鍾相隨劉伯倫竹林避世信天民朝朝痛飲餘杭酒
蘇小門前醉過春

渴眠篷底口涎流麩蘖為池糟作邱便向五湖成浪死

墓題應得醉鄉侯

京口中秋

歸棹前年酒滿缸
牽衣稚子慰離腸
却憐月色連秋色
依舊他鄉憶故鄉

奉天門進膳

江上風高未授衣
金溝楊柳得秋遲
不因宮宴糕糜粥
客裏重陽總不知

出龍灣之東阿

行李蕭條出鳳城，鄉閭漸遠不勝情。
客舟今夜寒橋泊，腸斷江聲作雨聲。

京城元夕

五年無路掃梧楸，夢裏關山只淚流。
誰送寒燈到先壠，異鄉明月故鄉愁。

泊瓜洲懷舊寄顧利賓王又新隱居

潮聲月色滿江船，回首春風十六年。
憶得石橋楊柳巷，珠簾銀燭聽歌眠。

京城題家書後示善鄰諸姓時玉珊自西河歸

莫遣春泥污短鞵莫將鵝鴨惱鄰家
窻前好種芭蕉樹
寫字題詩寄阿爺

虎牢雁門通馬邑酒泉黑水接流沙
憐爾西行一萬里
且喜除夕得還家

別時纖手牽衣送想見丫鬟似漆光
莫向堂前惱阿母
海榴窻下繡鴛鴦

短褐欺寒雙鬢迷當門新築野牆低
何時傍竹結茅屋

與爾長吟烏夜啼

經露筋祠

珠湖煙雨散晴暉
帆落風輕短棹遲
春草斷垣斜日裏
行人猶說露筋祠

望丹陽郭經楊子橋

楊子橋邊楊柳新
青帘斜照送行人
明日揚州看花去
祇憐不似舊時春

暖風晴日丹陽郭
處處東風是舊遊
記得杏花寒食候

紫簫紅袖宿江樓

題舅氏亭簡朱原立陳遂良陳原輔

渭陽池館花如霧
曲曲闌干面面池
記得少年遮妓飲
至今楊柳學腰肢

同陳伯寧連楊劇談悲歌有感

醉來拔劍斫珊瑚
懶向侯門更曳裾
夜半聞雞眠不著
草堂秋雨讀陰符

漂零書劍愧無成
日夜秋風白髮生
倘得黃金三萬兩

肯將籌策讓陳平

東湖憶舊簡劉子雍胡伯清汪宗彛

蕭家巷口花如霧紅粉闌干酒旆斜記得少年曾繫馬
如今無樹可啼鴉

離懷寄汪宗彛楊孟瑄魏居敬

綠樹啼鶉春又歸雨晴山徑濺香泥楊花不似離情薄
猶趁東風逐馬蹄

垂垂江雨作春波江上行人晚唱歌莫遣青燈照衣袂

酒痕不似淚痕多

墓草寄斯貞姪

江上飛花處處新
春山啼鳥似呼人
可憐愛酒無虛日
忘却劉伶墓草青

送黃彥美還會稽彥美嘗從故侯買里古思以兵
守越後為雪仇報恩一時稱誦

君去應須到會稽
故侯墓上草離離
信陵門下三千客
淚灑東風更有誰

少年賓客東南盛
金錯龍泉手自提
今日蕭蕭鞍馬裏
五更趨府候晨雞

暮春寫懷四絕

晴雪飛綿柳樹斜
雨餘紫陌淨無沙
春衫日日騎官馬
兩袖東風看落花

宮筵題就送春詩
簪筆承恩出殿遲
病目塗鴉不成字
粉箋香墨惜烏絲

揚州書記鬢蒼蒼
每向春歸欲斷腸
剩欲典衣酤酒飲

風流無復少年狂

青梅煮酒蕨芽肥
倦客懷家入夢思
想得故園風景好
一庭香雪落茶縻

秋詞劉子雍同賦

三首錄
其三

廣寒樓閣玉為朶
月裏姮娥百寶粧
流水莫題紅葉句
人間天上隔宮牆

桃源舟中聞雁

山郭桃花亂欲飛
滿篙新水漾魚磯
望鄉不似沙頭雁

一度春風一度歸

待渡溪澗寫懷

愛花如夢少年狂
雲鬢鸞釵百寶粧
三日醉眠金帳底
春衫渾是麝臍香

畫船曾駐渡頭西
翠黛凝歌憶送歸
今日不堪重繫纜
滿汀烟樹昔人非

繁華雲變都非舊
一片寒沙卧夕陽
唯有壞垣春雨裏
野花猶似美人粧

桃花扇底春風面一曲吳歌一斷腸紫陌紅塵多少夢
鬢絲贏得老劉郎

子舅氏朱民俊會心憇老二亭幼時往還必預宴
賞今已荒棘重來有感柬朱允容允實

春風亂向雨中過眼底閒愁奈若何憶得兒時騎竹馬
會心亭上醉還歌

憇老亭西多牡丹年年攜酒向春看于今池館都非昔
野燒凝烟暮雨寒

讀魯志敏王信臣詩有感東童汝能

魯連王建都仙去風雅無人可共參
零落酒船一百斛
鶯花腸斷老江南

送人之欽州

君到欽州四月過春深銅柱翠如磨
平生一掬英雄淚
寄向東風弔伏波

惜別詞端孝思同賦

玳瑁筵前海榴樹歌舞翻成離別處
花間藏却珊瑚鞭

手挽郎衫怕郎去

纖腰娥眉眼如醉惜別含羞郎枕臂鴛鴦枕上哭垂垂
一聲一滴珍珠淚

秋夜詞

二首錄
其一

銀牀露滴梧桐葉紫殿香銷水沉屑玉簫吹罷晚粧殘
半捲珠簾拜新月

蘇小小歌同端孝思賦

棠梨花開春日遲綠窻銀屏鸚鵡啼玉驄慣識尋芳路

手縮同心約郎去

五言今體

題呂花園草堂朱雀橋

何處銷殘暑城南茅屋幽晚烟將野色春樹帶江流
愛竹從兒種耽杯與婦謀生涯成老圃不是故時候

郊居雜興柬陳遂良

桃李漫成蹊茅堂習隱棲泉聲溪碓急山色野牆低
相領原非燕圍腰底用犀不嫌生理拙抱甕灌吾畦

風雨行人少柴門午上扃土花泐砌碧山果墜枝青病
眼耽書癖衰顏托酒星經邦方上武寂寞抱遺經

草閣門深掩香篝火未殘綠陰梅子雨翠袖棟花寒多
病腰如沈聞愁鬢已潘幾時將小艇一箇釣魚竿

老懶慵巾櫛琴書亂滿牀粉牋斜草字金鴨靜焚香竹
筍連窻綠枇杷隔樹黃久諳猿鶴侶無夢到巖廊

題朱澗槃卷

遙峯連碧磴茅屋俯青林徑晚花粘屐松寒雨潤琴酒

甘和菊釀詩苦帶茶吟却憶文園老歸來雪滿簪

寄子昇必昭昆季

烏石山頭路秋風已送涼野橋苔浸碧雲碓稻春黃扇
影搖衣桁書聲出草堂惠連無俗事垂釣濯滄浪

夜直呈翰林諸友

中使傳金鑰嚴兵戒紫扉月高旂影直風急漏聲微鵲
倦驚龍燭螢閒綴鳳幃不眠瞻北斗拜舞敢遲違

古木龍蟠

東源八景為
裕齋叔翁題

古木蜿蜒屈虬枝若有神鐵柯纏紫鬣黛葉蔽蒼鱗
幹卧南陽雨根分劔水春只愁雷電夕奮迅起秋旻

巨石虎踞

拳石如蒼虎嶙峋猛勢盤負嶠雲骨潤飲羽土痕乾
曉踞千巖震秋蹲一壑寒野牆斜日後馮婦下車看

雙溪明月

月照雙溪水春流燕尾义光移船柁轉影落釣絲斜
壁彩澄鷗渚金波漾雁沙扣舷清不寐浩興欲乘槎

萬斛晴雲

萬斛雲姿秀巖棲伴古松尚橫秦嶺態猶帶楚臺踪林
碧晴縈絮天青晚作峯也曾闕出岫上下逐飛龍

石井靈泉

山根遺古井雲骨浸寒漪碧甃苔花澁銀牀野樹欹葛
洪仙後浚賈誼謫前窺病渴愁無地清泠一嚙奇

草堂修竹

萬箇琅玕竹茆堂一榻寬窻連棲鳳榦簷近釣鰲竿涼

月淇園夜西風渭水寒此君何可少日日報平安

西山爽氣

絕愛西山爽簾深醉眼新黛濃窗掩戶翠濕樹生春送
晚登樓屢延晴拄笏頻晉人風致遠長嘯愧緇塵

東閣書聲

草閣深絃誦吾伊徹夜分鄰雞銷夕漏簡蠹護香芸山
鬼吹燈聽溪僧隔竹聞斷機遺訓在秋夢落青雲

六言今體

歸舟懷善鄴廣海未回

梅子黃垂雨霽榴花紅簇風輕天際歸舟何處日暮柴
門自扁歌憶杯痕蝻綠鬢憐鏡影鸞青心折少年塵夢
絳囊夜照流螢

七言今體

七夕宿天堂寺

西風吹夢宿僧堂誰遣黃金布地裝萬葉寶燈秋弄影
九重珠塔夜浮光天連象闕星辰濕雲護龍宮雨露涼

門外三車何必問大千身色兩俱忘

遊丹青閣

橋南楊柳亂成行出郭尋僧到上方
城拱烟霞開錦繡山圍松竹奏笙簧
半簾晚翠涵溪閣一枕秋雲護石牀
安得遠公同淨業白蓮池上挹天香

寄武夷隱者余復嬰

習隱名山四十年羊裘鶴氅鹿皮冠
雲中杵臼聞雞犬月下笙簫引鳳鸞
霞氣濕衣晨採藥虹光穿樹夜燒丹

姓名漸覺無人識，種得胡麻祇自餐。

青樓曲劉子雍胡伯清程伯羽同賦

四首
錄二

繡刺鴛鴦午夢長，體嬌無力浴蘭湯。
生憎寶鏡鸞成匹，死恨銀箏雁作行。
舞罷柘枝低拜月，歌殘桃葉懶添香。
愁來自學秦宮女，簾底吹笙引鳳凰。

寒鎖粧臺粉怯勻，步蓮金小不生塵。
徑迷花雨鶯鶯月，枕壓梨雲燕燕春。
衾剩半牀閒翡翠，釵分一股擘麒麟。
玉梅好似郎顏色，只見東風不見人。

簡戴彥碩

故人結得草堂低，老圃連城近市西。
碧注硯池荷葉露，紅黏屐齒杏花泥。
書懸牛角朝畊地，飯飼魚苗晚灌畦。
只恐長安雲路近，馬蹄催夢聽朝雞。

寄徐指揮

報國功成鬢已蒼，承恩分節下南荒。
劍磨鯨海遺腥血，馬渡龍沙帶戰瘡。
頌宴曉沾仙掌露，賜衣春帶御爐香。
信陵門下今誰在，萬里雲霄一羽翔。

呈西平侯沐都督西征

西土憑陵久不賓，詔書五道出將軍。
龍光燭劍銷邊祲，虎炁揚旌壓陣雲。
周廟昔聞方叔頌，漢廷今見貳師勳。
春風三月鶯花禁，歸騎笙歌奏凱聞。

和都督馮公韻

鳳城宮闕倚蒼山，虎衛旌旗拂畫闌。
輦路霜清梅破臘，御溝波暖柳欺寒。
青雲毋愧班超筆，華髮應慚貢禹冠。
未信壯懷渾寂寞，錦衣鞍馬出長安。

早春呈吳待制

上林春早陌塵香
紫禁觚稜射日光
新綠御河搖柳黛
小紅宮樹試桃粧
山連曉氣蟠龍虎
臺枕東風憶鳳凰
心折故園幽興獨
尋僧看竹過鄰牆

寄許永明公冕昆年得夫先生

少年曾共請長纓
雲壓旄頭劍氣腥
諸葛有心扶漢室
包胥無淚哭秦廷
九鰲夜徙龍沙黑
八駿秋迷鳥道青
一別關河俱白首
斷腸烟雨滿長汀

寄賈文彬巡檢

故人為別動經春野渡維舟送夕曛銀燭照窻秋聽雨
角弓懸壁晚看雲山城旗影中流見草閣書聲隔岸聞
江漢茫茫多舊識猶能俎豆說將軍

與子昇弟觀捕魚

柳條風脆已梳黃潮落溪毛石露梁帆脚壓霜寒撒網
柁牙移月夜鳴榔載車有獵曾占渭鼓柁無歌豈濯湘
又得錦鱗長尺半鄰翁新酒正吹香

簡陳彥友陳伯諧陳伯純陳良遂

飛鳥長弓紫氣高驅馳王事寸心勞
烏桓月黑迷犀甲雁塞雲黃按虎韜
禁漏尚聞金瑣闥御香猶惹錦羅袍
劉郎老矣歸來晚花落山中舊種桃

寄徐彥亨有懷操公琬先生 二首

故家文藻獨遺芳喬木陰陰覆短牆
草壓山營迷虎旅樓遺宸翰秘龍章
芸翻蠹影書帷靜竹映鵝羣墨沼香
訪戴真成風致在夢懷風雨舊連牀

天馬秋高壓楚墟，碧溪晴樹晚縈紆。
書聲連屋聞絃誦，山色當窻列畫圖。
治縣已聞蝗避去，解官曾有犢留無。
百年耆舊多零落，白髮相看愧故吾。

悼亡呈敬義叔

寂寞凝塵落暗簾，綺窻秋鎖月纖纖。
紅銷蓮粉雙遺襪，綠委菱香半掩奩。
絃斷鸞箏膠擬續，針閒鳳繡唾還黏。
最憐稚子黃昏候，拜罷靈前短燭添。

慶張子鳴新居

子鳴子妹壻也

華屋新成曙色開，蒼烟喬木帶紫迴。
朱闌暖護宜男草，綵服香浮阿母杯。
梅瓣粉飄催臘轉，柳條青裊送春來。
羨君盡得溪山勝，不愛雲臺愛酒臺。

徐叔度黃子初王仲愚同宿徐彥輔齋次韻

草堂不厭客，過臨清暑銷。
塵帶石林溪，靜白鷗晴泛影。
樹幽黃鳥晚，留音綺窻分。
榻簾陰轉，銀燭移樽漏滴深。
向秀不堪鄰笛感，墓亭秋思易傷心。

拜文公朱紫陽祠堂呈江惟中朱士止蘇明遠

奎壁垂光間氣鍾儀刑一代屬成功
泗沂道重尊天下濂洛源分出建中
僻壤魚蠱沾化墨中原麟鳳仰遺風
滄洲寂寞斯文弊淚灑秋烟野殿空

過蕪城懷古寄程伯羽劉子雍胡伯清

珠簾十里瓊花月唯見荒城背夕曛
潮落邦溝迷廢壘樹連瓜步帶殘雲
雄文猶記陳琳檄故苑空遺煬帝墳
書劍昔曾趨幕府白頭應愧鮑參軍

淮安懷古

淮陰城北水連空
漢將真成一夢中
古廟卧苔蝸觸角
故壇迷草鹿生茸
要君固有封齊貴
赤族當存定楚功
漂母孤墳何處是
欲將蘋藻薦西風

鄂城懷古

黃鶴磯頭鸚鵡洲
星分軫翼據江流
周瑜樓櫓風雲冷
庾亮旌旗草樹秋
折戟戰餘潮蝕鐵
量沙餉絕夜呼籌
賦詩橫槊今何在
殘月啼烏故壘愁

長城懷古

西瀝東洛建皇都四海梯航稱貢輸楚霸恃強窺寶鼎
越裳遵化錫駟車銅駝卧棘愁難遣野鹿銜花讖宣虛
玉輦金輿俱寂寞離離禾黍感邱墟

襄陽懷古

東連吳會接南荆西引岷峩鳥道青波漲潭溪曾躍馬
臺荒郢樹憶呼鷹鹿門龐老遺殘徑峴首羊公有故城
零落斷碑風景異至今父老涕縱橫

梁園懷古

紫炁紅光甲馬營
逶迤汴水遶神京
侯嬴曾執夷門轡
朱亥能移晉鄙兵
公子宴春珠結履
道君朝斗玉吹笙
鑾輿一去繁華改
秋雨荒畿燐火生

秣陵懷古

鳳凰臺倚鎮淮東
六代江山指顧中
晉鄙黃旗曾渡馬
金陵王氣已飛龍
橋通朱雀連丹闕
巷繞烏衣接紫宮
王謝堂前雙燕子
落花寒食又東風

錦城懷古

炎火中微建大旗王師頻出劍關西烏蠻地控南雲險
白帝城高北斗齊霸業三分扶漢室雄才十倍勝曹丕
神州未復英雄死八陣圖成國祚移

錢塘懷古

雲開天目界勾陳五衛旌旗控紫宸甲馬壓潮知北運
珠龍沉海失南巡乘鸞王母迷青鳥飛虎將軍卧石麟
腸斷蘇堤堤上柳年年春色翠華新

燕城懷古

廣寒宮殿玉為樓萬歲鰲峯壓九州番國胡僧青鼠帽
天魔宮女綵龍舟鈎陳蒼闕山南拱汰液紅橋海北流
唯有蘆溝溝上月年年鴻雁不勝秋

姑蘇懷古

城枕姑蘇笠澤西垂虹橋接草烟迷闔閭古墓騰金虎
西子殘池失水犀抉目樹荒羣鹿走捧心臺廢亂鴉啼
館娃香徑歌遊處響屨廊空落燕泥

咸陽懷古

勢踞峭函百二雄阿房樓閣鎮當中坑儒硎谷灰纔黑
繫頸咸陽火已紅蛇斷血腥空大澤龍成寶氣已新豐
秦功漢業今何處落日沉西渭水東

除夕柬丁兼善

荆門樹色雪初乾客舍年華臘又殘衰朽每蒙明主念
旅棲多賴故人安篝痕凝翠香煤暖窻影紅搖蠟炬寒
自喜明年春信早鶯花澤國趁歸鞍

燈夕寄胡梅屋

鬢影東風春雪晴又從元夕客江陵輕寒簾幙家家酒
明月笙簫處處燈雲擁鰲山金絡索天連鳳闕翠觚稜
瓊林歌舞花成陣宴賜黃柑憶昔曾

題王粲樓

漢燧淪輝鼎未分英雄無地託芳鄰中原紫氣爭龍虎
大野玄陰閱鳳麟地控烏蠻通楚澤城連白帝接荆門
登臨不盡關河壯醉倚闌干筆有神

娥皇廟

南狩輶車六轡摧娥皇遺廟儼江隈繡幡日月雙龍冕
翠嵌雲霞九鳳釵眉黯蒼梧迷徑襪淚封斑竹鎖粧臺
祇憐父老猶存敬伏臘稱臣撥篆灰

關廟

不憤炎靈國步迍忠肝義膽整乾坤紫髯猶帶風雲色
赤驥曾蒙戰伐塵一劍三分存社稷寸心萬死託君臣
氣凌華夏曹瞞走遺廟空山薦楚蘋

鄱城歸舟同何希憲共載劇談悲歌有感

霜落長河見遠洲
天晴歸棹喜同舟
青連碧樹山回轉
白湧寒沙水倒流
弓影浮杯疑老病
雞聲牽夢動離愁
英雄過了前三十
晚景桑榆愧白頭

宮果

每蒙明主念微臣
宮果頻頒品味新
勅遺翠罌分紫署
恩傳玉食下丹宸
蜜脾甘沁薔薇露
駱乳香浮茉莉春
頭白文園多病在
愧無詞賦氣凌雲

賜衣

十日江城雪擁門
官衣頒賜念微臣
天機織處經綸密
雲錦裁成黼黻新
寵被光榮沾雨露
暖回衰朽感陽春
祇慚蒲柳桑榆景
犬馬丹心敢後塵

謝惠柑答劉子中

黃柑分寄遠承將
擘處霏微曉霧香
清潤曾經湘岸雨
圓酣猶帶洞庭霜
薦餘詔許功臣賜
宴罷恩先近侍嘗
歸卧滄江今白髮
擎來病目淚成行

過錢朝陽故居有感
東程伯羽汪宗彝

短牆依舊草堂深
蘭徑重尋思不禁
芍藥紅殘花漂雨
甘棠綠嫩樹成陰
帖臨青李池遺墨
曲奏朱絲壁憶琴
回首風流陳迹冷
山陰鄰笛淚沾襟

弔杞上人

重來湖上弔山僧
淚落東風憶葛藤
江海有詩傳慧可
業林無法繼盧能
草深方丈迷春屐
塵暗袈裟掩暮燈
因憶沔陽錢太守
芭蕉亭上賦詩曾

庚午中秋時善鄴留海南玉珊戍閩中

桂露涼生草閣幽濕雲斜逗月光浮清懷誰寄袁宏詠
黃落偏驚宋玉愁身侍鳳牀曾捧日鬢凋鸞鏡易驚秋
遙憐稚子關河隔欲舞狂歌倦更休

秦淮元夕次宋學士韻

簾幙輕寒著柳條宮壺停漏夜迢迢虹橋列漢通鰲影
翠輦扶雲落鳳毛歌轉鶯春花作陣步搖蓮暖玉生嬌
綺羅留眼歸來晚斜月樓西轉樹腰

送王待制省親

九重承旨省庭闈白舫青簾出御堤江樹嫩寒萱草雪
驛程新霽杏花泥賜衣紫錦裁鸞尾歸索黃金鑄馬蹄
綵侍日長多宴暇應尋禹穴舊游題

俠氣

中年俠氣未全消通籍金閨躡紫霄龍尾趨班晨漏轉
螭頭簪筆晚香飄柳迷輦路迂瑤佩花壓宮牆度綵簫
報國自慚衰朽質經秋歸夢到漁樵

左掖早朝春雪呈王子充待制練伯尚左史

朦朧苑樹紫雲低，漏轉宮壺曉色移。
凍合鳳池銀燦爛，光連鴛瓦玉參差。
黃封暖賜承恩近，綵筆寒凝侍講遲。
絕愛上林春色早，瑤花先發萬年枝。

拜外舅陳公禹謨墓東陳原轉

貳館東風憶昔年，笙歌如沸酒如泉。
麒麟錦帳銷銀燭，孔雀雲屏列玳筵。
井塌銅瓶渾卧雨，香闌瑤珮暗迷煙。
傷心孤塚楓林外，寒食殘花墮紙錢。

和九日韻寄朱見中

野樹荒臺帶晚陰昔年歌舞憶登臨
桃花紈扇西風冷
蔓草銅駝夕露深
舊夢青雲連館閣多情華髮老山林
江南庾信傷秋倦
疎雨簷櫳怯暮砧

憶從天上宴黃花
烏帽秋欹鬢影斜
宣賜宮壺香注蟻
醉簪綠筆墨塗鴉
雲連雉尾開金闕
日射鸞輿引翠華
退食從容休沐早
短屏驚雨夢還家

拜大父墓張家山呈雲濤兄

瞻拜靈光思不堪
飛雲冉冉護晴嵐
墓亭瓦落迷苔礎

隧道泉空漱石潭華表年深遺白鶴黃腸春暖蝕金蟻
深慚未立墳前碣白髮臨風涕淚含

端午呈敬義叔

涼雨晴時艾葉肥家家將綠上門扉土墻樹密黃梅熟
草閣簾深紫燕飛病臂謾纏新綵索御香猶帶舊羅衣
鄰翁有酒招相飲醉不顛狂晚不歸

寄章復齋太守

草堂背郭瞰湖陰石徑苔痕雨後深犬識鄰僧諳飼飯

鶴迎仙客慣聽琴相如去國徒空壁廣受歸鄉有賜金
辦取酒船三百斛醉歌贏得雪盈簪

予弟劉勳字彥輔少習舉子業好兵家書便弓馬
不事產業壬辰兵起倡義樹旗及大明有天下同
浮梁于光以兵從征九江斬黃轉克台明定蘭秀山
鎮閩中守潮陽以疾終予聞而悲之惜其平日以
功業自許二十年躍馬食肉于軍中所至有戰績
竟不克以成名命也夫

弱鬼人驚氣食斗義旗先倡萬人收劍磨狼血蠻烟曉
箭洗蛟涎瘴雨秋才大孔融徒愛國數奇李廣不封侯
行人傳計疑還信何處羈魂土一杯

次秋日韻奉汝弼叔

墨池秋淨水痕澄曲几焚香袖手憑霜煞柳條清粟里
雨荒瓜蔓覆東陵戰餘趙壁車還列說下齊城軾獨凭
因憶少年隨驃騎西風笳鼓醉呼鷹

三徑歸來菊未荒半凋楊柳弄初涼銀屏紈扇題秋句

金鴨羅衣換夕香老憶風雲趨北闕夢無花月待東牆
狂游尚記秦樓別翠袖紅綿拭淚行

謝惠杏東劉子中

涼雨晴時杏子新筠籠分貺感芳鄰摘來黃熟連香潤
捧出紅圓訝色勻漢苑賜沾趨內省文園歸卧老江濱
年年煮酒仍題句白髮相看慰故人

經梅林李待制故居有感東徐伯推縣丞

矯矯雲霄一鶚翔行人猶指鄭公鄉窻遺月桂天香冷

庭鎖秋槐暮雨荒賦對御筵題羽獵恩沾宮宴奏霓裳
舉頭見日長安遠故硯塵迷白玉堂

賦斯旭姪古銅香奩

香奩制古暗塵霾吟袖摩挲秀潤開翠蝕螭文迷歲代
金銷龍篆雜雲雷華堂秋暖凝雞舌燕寢霜寒壓麝煤
最愛酒醒殘月候澹烟斜縷伴琴臺

弔故姪

一身去國苦流離壯志無成亦數奇癘鬼有靈終殄賊

吳師貴恨未鞭尸波連落日羈魂泣塚斷秋風馬鬣悲
幾度白蘋洲渚暮老懷酸澁淚如絲

十二月四日壽雲濤兄

霜清紺宇列文星梅沁香雲護短屏肝膽一生懸古劍
乾坤雙鬢老浮萍夢連漢苑春迷蝶心折韓憲夜醉螢
贏得東風一樽酒長歌爛熳宿寒廳

癸亥社日示子姪

楊柳青青燕子來鄰翁分社笑顏開長瓢抄雪香炊飯

老甕浮春暖潑醅桑柘日斜人共醉
楓林烟靜鼓如雷
衰年病耳何勞治
賸欲辭杯懶放杯

花朝雲巢叔小飲

野人門巷土牆低
雨壓春寒思欲迷
衣綠濕沾芳草徑
屐紅香惹落花泥
筍燒玉版晴浮蟻
餅切瓊酥晚割雞
乳燕鳴鳩寒食近
杖藜攜酒過溪西

乙丑春拜先隴於潘超村

芳池流水亂穿沙
料峭東風鬢影斜
殘粉臘催梅褪瓣

嫩黃晴轉柳生芽，暮亭瓦落松飄子。隧道泥乾，蘚蝕花
碣石有題，慚未勒幽光。潛德思無涯。

送春寄楊孟瑄

腸斷春光幾日晴，登山臨水送將行。天連草色圍孤嶂，
樹帶河流遶故城。幾點落紅驚蝶影，一庭新綠占鶯聲。
殷勤更約明年早，酒對陽關慰別情。

春雨夜坐有懷梁時用

苔綠沿蝸上粉牆，烟凝睡鴨夕衣香。茶糜夢冷銷銀燭，

燕子春寒憶杏梁
病目經時花似霧
懷人聽雨草連窻
何時艇子東湖上
攜酒高歌對夕陽

聞馬孳馘首有感自賦

淒涼遺恨鵲鴿原
家國仇讎不共天
十載枕戈心獨苦
一身嘗膽夜無眠
金蠶春冷雲迷樹
碧血年深草蝕烟
積惡豈應魚漏網
馘尸今向藁街懸

自述二首

錄其一

閒道平生志氣高
宦遊千里不辭勞
東阿遠想迎三釜


南海多詩解六韜貪看彩雲栖布被豈知花落濕銀袍
從今莫問封侯事好向山中學種桃

立春五日雪中寄房山旅館諸友兼簡余評事

新春五日轉添寒客館難禁久未還凍合層冰生甕底
光浮積雪滿窻間袁安高卧憑誰問杜老追遊祇自閒
寫就新詩寄知己隔鄰沽酒一怡顏

曉來積雪遍天涯寒氣侵人日漸加梅萼香消都結實
柳條翠淺半生芽牀頭金盞還賒酒澗底泉清任煮茶

澗漾瑤堦天咫尺詩成凍筆笑塗鴉



鄱陽五家集卷十二

欽定四庫全書

集部

鄱陽五家集卷十三至十五

詳校官監察御史孫家賢

主事銜臣徐以坤覆勘

總校官知縣臣繆琪

校對官中書臣高中

謄錄監生臣陳夢蘭

欽定四庫全書

鄱陽五家集卷十三

鄱陽史簡編

明劉炳春雨軒集二

五言古風

擬古

今人多結勢古人多結心結勢可趨利結心能斷金
堅義益固利厚害彌深往者不咎昔來者當鑒今

得漢彝簡周伯寧索香灰

古彝多款識
蟠螭漢篆存
黃金銷土色
翠羽蝕雷文
綺席流寒月
銀屏度影雲
蘭灰能裏寄
長吟盡夜分

春夕直左掖懷周侍郎

晚雨池上晴
透迤淡將夕
金莖華月生
綺樹流雲濕
窻虛漏聲永
幔捲爐烟襲
憶我同袍人
何由共瑶席

簡孔博士

宿雨曉還歇
開窻銷鬱沉
烟光藹芳樹
池上鳴幽禽
透

迤瞻郡齋窈窕期盍簪孤懷屢百積羣疑思一箴何時
聯夜榻春漏委波深

左掖門朝退呈吳待制諸公

謬忝金閨籍聯班趨晚朝
逶迤西上門窈窕長安橋
殘雪帶遠樹夕陽在山腰
不有同袍者疇能慰寂寥

張禮部卧疾

殘雪晚還霽窻虛斜日迴
故人久卧疾空階生綠苔
兒童詣藥裹吏牘委塵埃
浮榮每為幻長嘯望層臺

別京邑之東阿

前年別鄉閭今年出京邑悠悠去江漢香事行役所懼心志違
况此風波急烏啼楓樹烟雁下蘆洲夕回首望長安蒼茫寸心失

憶園廬

種園在東臯草荒瓜蔓長日落秋樹涼褰衣獨還往時
逢野老憇自足田園賞沿溪暝忘歸古寺烟鐘響

示宜學績學甲戌三月題

阿爺五十四憐汝纔始生恩育夙夜謹眉目秋水清行

如生鹿跳語若流鶯鳴當時恣嬌頑計日期長成爾祖
豪傑姿聲聞州郡欽一顧等成敗片言能重輕田園巨
阡陌兵火成榛荆千頃遺寸波百田纔一塍官租因訟
致薄業寧躬耕不辭生理苦所懼徭役并嗟予蚤失怙
慈親訓遺經遭時風塵黑扶日雲霄青簪筆侍禁闈通
籍居承明衰年遂冉冉薄宦徒營營辭官歸故園葺屋
依先塋看花眼如霧種竹髮已星貧無金在囊家有書
滿籬念汝未強壯立身恐伶仃痛逼骨肉懷感慈肝膽

驚男兒在忠孝業學崇勲名題詩冀爾識慰我桑榆情

賦清華堂詩

皇威戒安逸翰苑游神機
天球在東序玉藻羅北扉
蜿蜒紫氣潤璀璨虹光輝
奎彩動黃閣文光照彤墀
鼓枻洙泗源遵舟伊洛湄
梁追昭明轍漢軼東平輓
瀛洲浮暖吹銀潢演春漪
芝蟠五色葉桃發萬年枝
墨沼鵝羣浴書林燕子飛
花陰移鶴仗竹色來鳳儀
共沐恩波潤咸蒙聖澤滋
河清仰文化同軌固磐基

聽雨堂為安成周氏賦

中年迫宦游邈若胡與越悠悠烟樹遙杳杳關河絕况
茲風雨夕坐想鴻雁隔篔簹寧共理孤燈耿還滅懷寶
重經濟括囊貴明哲何時對牀眠慰此腸內熱

敬軒詩為王達善賦

深巷何窈窕端居掩柴荆素心每無欲寡朴輕浮榮慮
盡默自守神清淡忘形危坐白日晚疎林微雨晴開窻
幽鳥啼蒲階芳草青焚香卷絲桐愛此銷塵纓孤雲野

鶴唳絕壑流泉鳴高懷曠而婉雅音誰復聽古人良已
久寸心千古情

郡齋讌集詩呈徐用中廣文諸先生

郡齋文墨暇履端集朋曹春意藹萱草臘痕封柳條窻
暄書蠹散簾深鑪麝飄嘉園剪新韭芳壺湛清醪青甘
浮椒欖紫腹吹葡萄舒此羈旅况豈夸樽俎豪禮簡貴
情厚心親自神交所念萍水逢回首江漢遙天府重賢
詰山林來俊髦者年多桑榆席珍比瓊瑶何殊瀛洲步

未讓淮南招俯仰
慰夙慕綢繆
幸今朝題詩謝永好蕪
詞慚草茅

烏石樵歌

義城十景

烏石岡在義城東五里許
劉公德新愛其地有林
泉之勝故卜宅築池以樵牧
隱居焉

烏石岡頭路林巒勝景開
洲連青野闊山俯碧溪迴
墨沼春生草書堂雨陰苔
樵歌時出谷野興屢登臺
自得園廬樂生涯不用媒

花橋釣艇

昔青田知縣劉公英嘗游釣於斯橋廢後友松公

重建

花橋通駟馬錦里昔鳴珂紅雨桃飄浪青絲柳蘸波石
闌晴更倚釣艇晚還過魚暖金翻藻鷗涼白宿荷先賢
多勝賞落日一漁蓑

魯壇古市

市在花橋東唐宋時甲第駢湊絃誦之聲連戶敦

尚禮義春秋設壇祭祀有鄒魯之風故號魯壇餘
蹟尚存

洙泗流波遠尊崇百代同衣冠循習氣俎豆想餘風市
廢殘槐綠壇虛野杏紅壤垣迷古鐸宿草卧懸鐘文沼
今更化絃歌幸歲豐

漢營餘壘

先世中書令潁川王尚書劉公汾曾駐兵於義城
之南故號漢營有餘壘存焉

先世逢昌運經邦建武威六韜開豹略八陣出魚麗山
岳雄圖在風雲霸業移泉聲悲鼓角樹影見旌旗自擬
羊公石登臨不盡思

雞籠曉月

雞籠峰在汪師源東一水迢遙自山門出五里許
入河其山峭拔而圓每曉月流輝烟霧杳藹狀若

雞籠

林巒多勝概彷彿類雞籠古木千章繞流泉一脉通曙

光渾杳靄雲氣總朦朧玉兔還留白金烏未吐紅降神
生俊彥何必羨高崧

馬鞍晴雲

山在金竹源東北形類馬鞍上有僧尼創庵希仙
慕真峰巒奇絕雲氣飄揚四時不改

二氣多融結奇形解六飛嵐光時吐吸日影半熹微頃
刻成蒼狗須臾變白衣去來如有意動靜總忘機一旦
為霖雨豐穰賑歲饑

清新酒旆

館在花橋之西杏村之口酒旆高懸商旅市沽得
有所濟

結構清新館晨昏絕市囂柴扉通杏塢竹徑接花橋日
暖醅香好風清旆影高漁翁頻岸幘行客屢停輶喜際
羲軒世酣歌慰寂寥

綠野書樓

樓在義城祖住傍先世建樓數間以為書塾竹樹

陰翳軒窗幽豁四時吾伊之聲自宵達曙焉

先世儒為業建樓多蓄書不殊裴相宅那讓鄴侯居繞
屋竹自長侵堦草不除往來無俗子談笑有才諳即此
供耕穫何須菑與畲

櫟洲雁集

大溪之北桐江之南有洲寬平百餘里其上柅柳
成林秋風零落則有鴻雁翔集焉

櫟洲秋色晚鴻雁日回翔已解逃曾繳應能飽稻梁肯

同鷗伴侶偏與燕參商靈囿沾仁化周詩薦樂章帛書
曾繫足千載仰蘇郎

鐘潭龍蟠

鐘潭在碧灘之下百頃澄澈潭際奇峯筆立一古
寺存焉世傳下有洪鐘中有伏龍

巨鏞隱靈物潛伏碧潭深冶鑄知因昔流傳直至今波
濤時洶洶雲霧日陰陰自有為霖志能無濟世心何時
九霄上鼓舞發清吟

經白將軍故第

粉牆將暖日依舊柳條新上馬臺邊路春風無一人畫
梁暗巢雀綺席委芳塵桃李東園夜餘香斂翠嚙

雲濤兄歸寔于分鄉界辛未年十二月二十二
日也

同氣義所感永訣情更傷老淚酬荒草孤酸割柔腸懸
旌風帶色掩隧日無光豈止山陽笛簫騷起白楊

經汝弼叔故館有感而作呈汝尚叔及彥常弟

山館澹將夕寒燈對爐熏牆陰古梅路池深芳草春疎
櫺帶斜月連牀非昔人履綦無往跡琴冊有餘塵坐感
歲時改心悲文采湮緘題不忍寫悽惻淚沾巾

哀三良同周伯寧賦

為臣既委質一死詎所辭况茲三良賢捐軀視如歸傷
哉秦氏惑殉葬非聖儀維時百職事謹議無良規死者
百世義生者千載悲

題丁氏晚香卷

百草秋已謝佳菊獨含姿涼颯動清馥夕露敷寒蕤透
迤掇三徑窈窕盈東籬誰憐幽貞操自託遲暮期持觴
挹其秀靜使君子宜

出塞

九重頒鳳詔單于入井陘三邊徵候騎五道出奇戰
雲連陣黑烽烟照漢青蛇文弓掛月龍氣劍流星酬恩
不顧命金印斗來擎

入塞

旄頭昨夜斂徵兵入漢關將軍定勲業壯士悲刀環旌
裂雕雲畫衣穿龍錦團碩月老鄉淚風沙銷箭瘢閨中
謾歌舞今日到長安

獨處愁

金屋人稀到閒螢去復回攬衣離鳳閣緘思捲鸞臺惟
有多情月流光入妾懷

東武吟

壯年投筆去手提三尺箠戎衣纔至胔短劍光陸離國

士每自許獨賴相公知解衣衣我寒推食充我飢心懷
犬馬報未有涓埃施十年在幕府徒將文墨持前星一
夜落天地黯無輝功勛都若夢部曲各分違春草門前
綠空遺櫪馬嘶月痕弓上掛雲影旆猶垂霸氣風雲散
姓名誰復題落日將軍樹淒涼過客悲長哀波浩蕩不
盡淚如絲

雙桐生空井

井上雙梧桐秋風易搖落綠葉墮鳴璫清陰捲重幄紋

甃生旅葵銀瓶響空索疏枝覆烏臺交柯臨鳳閣美人
矜容儀照影傷今昨鉛華逐波逝歡賞隨年薄行客琴
輓轡哀聲隔簾箔

七言古風

經撫河遇雪舟中睡午方起

沙溪風寒飛雪狂風大不敢開篷窻蒙頭裹被睡過午
柁底浪急聲春撞岸上楓林茅屋小新年家家無米糶
土竈作炊烟滿船灰壓濕薪蚯蚓叫山僮不惜途旅艱

靴綻衣薄雙眉攢艱難末路乃如此富貴有夢真邯鄲
却憶瓊林侍宮膳雪花不入黃金殿酒上朱顏萬國春
花簪烏帽千官宴錦牋綵筆賜題詩仙仗頻移出苑遲
身惹御香羅袖窄馬蹄歸踏杏花泥

弔晉安將軍歌

荔枝城頭花簇簇王孫不歸春水綠黃金臺前烟草荒
傷心獨倚青雲哭淚灑鑿江江倒流楚魂暮咽楓林秋
蕉黃綠醕湘竹語峴山石斷行人愁信陵門下簪纓會

珠履筵前幾人在軍中擊鼓夜不眠珠翠成行鳴劍佩
王孫王孫真貴人落筆龍蛇驚鬼神千金散士馬蹄盡
鐵甲晝卧雙麒麟桑柘陰陰連大路野市書聲晚當戶
部曲悽涼白髮稀甘棠猶指將軍樹玉鳧金雁漆燈殘
化鶴千年何日還有酒誰澆趙州土碧血化雨苔斑斑
王孫王孫不可招仰天擊碎青桐瑤寸心何處寫哀素
江上年年生暮潮

承承堂為洪善初題

善初三洪諸孫也

天狗蝕月歲靖康血戰于野龍玄黃神鰲夜泣九淵沸
翠華日薄寒無光主憂臣辱誓萬死直以隻手支扶桑
燕山六月雪花大節旄零落肌膚傷關河蕭條月色苦
扶風揚沙吹雁行子卿歸來典屬國茂陵樹老愁雲荒
至今勲業昭簡冊大書特書遺典章承承堂前春晝永
牙笏金魚堆滿牀芝蘭玉樹競娟秀陶令松菊凝秋芳
盈缸釀酒介眉壽槐陰覆堦萱草長忠宣盛澤實其美
宜爾子孫宜爾昌

題磨崖碑後

錦囊粉黛銷塵土香冷春迷山下鬼梨園弟子散如烟
六么誰按霓裳譜梧桐蕭蕭秋雨愁君王歸來多白頭
宮牆瓦落芙蓉苑輦路塵蒙華萼樓牝雞司晨古之訓
九齡先識非阿佞漁陽鼙鼓蔽黃埃臨洮戰血生青燐
二十四郡何無人但恨不識顏杲卿國忠既誅林甫死
勤王義旆趨咸京唐室安危誠再造汾陽令公國沉老
萬邦歸正泰階平九廟無虞靈寢掃大筆特書昭日星

龍蛇剝落莓苔青
嗚呼浯水瀉遺恨
父老至今雙淚零

題方壺畫為斯貞姪賦

巨然畫與書法同
縱筆所至生秋風
墨飛原氣瀉沆瀣
青摩斗角連崆峒
遠岫平林斷還續
苔根斜迸山泉綠
釣倚丹楓野老磯
門垂碧柳幽人屋
壺公騎鯨白雲鄉
壟樹綠泣烟草黃
風流文采今寂寞
對畫淚痕沾我裳

大梁行

大梁繁華全盛日宮闕浮天耀桃李魏國山河十萬兵
信陵賓客三千履上苑春晴花覆闌關雞走馬事金鞍
銀燭填街美人過紫蓋凌雲公子還五侯七貴行人避
吐膽傾肝論意氣朱亥能移晉鄙兵侯嬴自執夷門轡
回首英雄非昔時輦路人稀秋草迷舊游歌舞今何處
日落狐狸當樹啼

題蔡宗文趙氏譜牒後

苔連椒壁雲痕濕霓旌無色金仙泣杏花依舊落胭脂

梁苑凝烟春草碧相逢彷彿說前朝
譜牒香遺古錦幃
前代王孫今老矣天潢如髮際雲濤

瞻雲堂為淮西李仲良賦

仲良予妻弟也

生逢兵革離鄉邑故家門巷兒時習
壠上蒼苔覆墓田
城西喬木連寒石每憶年年寒食時
輕烟冉冉落花稀
墳前斗酒無人酌沙際殘碑有字題
漠漠長河孤鳥沒
九泉路杳嗟何及銀雁秋沉落木黃
金蠶春暝寒泉碧
漂泊縑塵幾日歸故衣線斷感春暉
終天一掬松楸淚

心逐孤雲日夜飛

題呂花園草堂代宋景濂先生作

官馬烏韉春踏霜鐘聲催我趨玉堂黃金帶重覺腰瘦
錦袍淋漓宮酒香殿前草詔東風急紫硯光凝墨花濕
承恩簪筆立多時華髮蕭疎倦無力聞道城南舊草堂
景勝林幽別興長碧連淮甸晴波暖青割鐘山曉樹涼
種柳萬條金覆井栽桃千榦粉連牆薔薇壓架綃囊綴
芍藥當軒錦幄張箇箇麝香眠石徑雙雙翡翠浴蒲塘

紅殘蝶翅翻風靜綠暗鶯吭嘒日忙游絲飛時寒食早
車馬城南爭拜掃夕陽影裏賣花聲游人半醉眠芳草
壚憶黃公酒旆斜竈遺陸羽茶烟裊何時休沐振
鳴珂紗帽輕衫試越羅信筆詩成還倦寫憶爾當
年郭橐駝

寒食客秦淮憶舊

去年寒食長途客桃花落盡梨花白今年寒食客秦淮
杏花李花無數開東風凋殘白羽箭落日獨倚黃金臺

緇塵蕭騷吹病目破帽烏靴泥漉漉藜杖東山弔謝安
悵望飛雲仰天哭淒涼心事更誰憐綠綺可以調絲絃
子期已矣伯牙死高山流水空荒烟王孫不歸芳草暮
解衣酤酒驅愁去誰言一醉可銷愁酒入愁腸肝膽露
便擬揚帆析木津仍期掛劍扶桑樹志士長懷溝壑憂
功名百歲等浮漚雨晴浪暖河豚上載酒滄江弄釣舟

題夏博士晉王羲之右軍像

上東門上鶴鷗嘯萬里塵飛洛陽道潛龍東渡晉中興

羣馬南浮國重造石城龍從昔所都庶事草草嗟良圖
衣冠簡傲禮樂廢朝廷放曠君臣疎大令平生最超卓
早年門第居臺閣內史新除典要樞右軍任重參帷幄
擅場翰墨出神奇蔡衛鍾張早得之畫長燕寢森兵衛
日暖鴉羣藏墨池來禽青李囊盛寄裏鮓黃庭醉後題
春風三月山陰曲羣彥流觴映修竹一時簪冕屬高風
百年文藻懷芳躅流落斯文慨古今後代宸聰復購尋
幾字昭陵傳玉枕數行定武抵千金忽見畫圖雙眼碧

采采羊神驚玉立羽扇蕭疎晚日晴烏紗彷彿秋麕襲
繁華如夢轉頭非典午山河幾落暉唯有鳳凰臺上月
春風依舊紫簫吹

子昔與孟思魯參戎事于三衢監司宋公幕府及
兵潰得間道還鄉遂歸休之志故歷叙之

嗟嗟漢燧昔沉耀橫流板蕩迷中畿鬼母啼烟赤電走
天狗墮地金石飛志士勤王涕沾臆義旆懸雲昭白日
劍擊風雲向夜悲揖誓山河仰天泣君當少年功節殊

短衣倒騎生馬駒，蠻箋草檄墨慘淡，寶刀砍血腥模糊。
奏凱對花歌窈窕，量沙卧雪宿瓊瑜，運籌制勝嘗輕敵。
凭軾降城不顧軀，幕泛碧油陳雅樂，漏殘銀燭合兵符。
孤軍轉戰經千里，蕭條榆塞塵沙起，秦樹關河落日低。
漢營鼓角西風裏，嫠女妖氛壓斷牆，嚴灘殺氣連重壘。
羽書援絕鬪兵稀，古道行人畏疾藜，霜銜白骨饑烏下。
秋入金瘡敗馬嘶，虞姬帳下將軍死，公子門前壯士歸。
去國共憐王粲賦，望鄉同擬杜陵詩，壯志無成還故里。

城西茅屋苔痕紫，鈎簾聽雨更焚香。
拄笏看雲時隱几，自信胸澄渤海清。
寧憐氣與高華倚，破浪誰擒北海鯨。
穿林學射南山雉，笑傲行將下澤車。
經綸懶取圮橋履，草荒三徑掩衡門。
舊事相逢不忍論，兩鬢緇塵銷歲月。
一雙蠟屐信乾坤，湘上雨晴飛落木。
與子登臨散幽獨，杖藜出郭路江沙。
一笑尋僧看修竹。

潯陽行

沙頭女牆啼野鳥，亂石如壘驚濤呼。
潯陽九派控吳澤。

匡阜千峯迴楚墟當時形勝夸疆土連雲宮苑旌旗樹
庾亮樓船赴國仇黥王版籍歸英主盛年一去水流東
冠蓋繁華處處空兩岸蘆花浸明月滿汀烟樹鳴秋風
古戍何人吹晚笛客船莫向城邊繫翠袖琵琶夢已寒
青衫易灑天涯淚

青藜軒為劉子雍賦

頗聞天祿青藜杖雍也自是今劉向漢啓炎精著五行
天符火德明文象太乙光分五夜深卯金氣應三台上

草堂人稀清漏長
紫薇花開金井涼
昭回雲漢星辰爛
黼黻文章雨露香
鏗鏘九節蒼虬幹
叩門絕愛齊眉短
桃竹風清豹髓凝
葛陂春早龍膏暖
銀燭無神暮雨淒
金蓮落艷秋烟滿
故人文彩筆如椽
制作于今軼漢賢
萬里羽儀調玉燭
九重柱石際凌烟

江都行

蕪城繁華天下美
處處離宮開紅紫
綵女龍舟錦作帆
內官鳳苑花裁綺
芍藥珠簾十二重
楊柳御堤三百里

鼓車巡幸翠華留夷梯航覲冕旒縣邑貢真三祝獻
諸侯稱壽萬年酬盤淫酒色窮奢侈宴安鳩毒亡邦祀
西苑歌鐘午夜遊東遼輻重三軍死寶成殿上奏鸞棲
晉陽城外飛龍起故國傷心非昔時五雲宮闕草萋萋
東風寂寞雷塘路月暗秋陰鬼火啼

寄徐宗周兼柬楊煥文阮宗泰

李家池頭去年別大風揚沙天欲雪贈我鯉魚三十腮
楊柳穿來帶寒血今年八月芝山樓我欲少住君不留

蹇驢落日冒秋暑鬢絲汗溢黃塵流近過阮公茅屋底
說君沉疴幾不起九月十月方離牀強健近來差可喜
相望片雲魏石山來往每嫌消息艱斯文凋謝少知己
恨不連牆相往還却憶少年從義日聞雞不眠追祖逖
殺敵風吹寶劍腥打圍雪壓雕鞍濕諸葛曾懷漢室憂
包胥亦有秦庭泣投老相看海日清夙昔患難同離情
歸來廬井有桑梓拜掃邱墓除榛荆傳家書在晚還讀
負郭田深春自耕愛君窻前修竹大聽雨何時對牀卧

却扶藜杖過楊兄使酒怕渠時罵坐氣略頗與常人殊
天經地軌談陰符凰岡溪頭懶垂釣未央殿前思上書
功名定有國士報肝膽好將民瘼蘇黃金之臺一千尺
白日橫飛虎生翼呂望八十方致身五十富貴朱買臣
時來勲業自有待豈得甘作漁樵人

澶州行

澶州城頭河水渾南城北城如虎蹲當年遼師犯幾旬
烽火照夜驚邊塵廟堂大臣惟肉食幸南幸北俱身利

臣瓊歷練老知兵臣準忠肝陳讜議九關半夜一雞鳴
大駕南征詔書出虎臣武將爭駿奔龍旌豹尾如星屯
六軍野宿犯霜雪萬乘露次昭風雲金節翠支光六轡
黃蓋城頭壓妖彗天戈曉渡國威張神箭星馳賊酋殪
重瞳一顧轉乾坤萬歲山呼震天地遼人氣懾不敢當
稽首俯伏稱誠惶三邊清寧海波霽四野桑麥紛牛羊
至今惟有萊公廟簫鼓年年歌歲康

題諸葛武侯廟

武侯古廟臨江市碑仆苔荒字殘廢巴東巴西巫峽長
父老至今來拜祭木牛流馬將何施君才十倍當曹丕
託孤付國寄大事輔不可輔卿為之股肱竭力誓臣節
五月渡瀘親出師君臣氣義出肝膽千古淚落令人悲
江流不盡潮聲咽嗚呼遺恨三分國沙際空遺八陣圖
蒼梧雲暝秋蕭瑟

義士歌

鄱陽胡公字振祖當元之季以義起兵尅復郡治

紀功授饒州府判後從官軍轉戰至浮梁與敵相
拒糧盡矢絕義不辱憤罵以身死之鄉貢蔡淵仲
先生為之立傳予作歌以著其節義焉至正甲午
也

崑崙晝裂黃河決京畿地毛白於雪鬼母啼秋天雨魚
武庫兵鳴劍飛血黃屋播越烟塵張四海感激思勤王
鄱陽胡公軀七尺義旌塞露寒無光鳶肩火色萬里壯
虎氣電目千夫強城頭陣雲壓鼙鼓醜酒椎牛題露布

破斧沉船曉更征囊沙擁水宵還渡萬乘千輿驟騎營
轉戰直薄浮梁城孤軍糧盡朝餐草間道人稀夜煮冰
鐵甲照霜弓影曲寶刀磨月水痕腥旄頭芒射前星落
恃勇驍騰身不却淒涼馬革裹尸歸誰復聲名寫麟閣
郡侯紀績筆如椽父老相傳淚泣然三尺荒墳何處是
忠臣後代子孫賢

荊州護衛指揮陳公伯英鞍馬之暇焚香吟詩高
懷雅量令人起敬賦詩承教

將軍少年英氣豪學劍論兵談六韜龜紋瑣甲紫絲轡
虎皮鞍鞵紅錦袍三尺雕弓兩斛力八歲龍駒雙佩刀
不憤旄頭如火赤從駕南征破絕域淮雁啼霜瘴月昏
駱駝載雪狼烟濕羽檄流星烽火連塞旗誓欲靜三邊
啣枚榆塞金瘡苦洗箭沙泉戰血羶柳陰日落鳴笳鼓
玉帳籌邊月當午酒壓葡萄壯士歌花挿真珠美人舞
奏凱歸來拜玉墀天恩頒宴畫樓西漢家未數蕭曹業
麟閣丹青姓字題

棲碧軒為陳指揮賦

鎖窗斜隔紅塵道
芳草滿簾晴不掃
塔前馬踏落花泥
柳外鶯啼春色好
羅袍犀帶紫金壁
上瑤琴牀上書
春挾城頭春雨過
一庭脩竹讀陰符

棲霞軒為王文質賦

丹霞爛兮五色光
昭回雲漢成文章
朝逐神龍若寥廓
暮隨威鳳同翱翔
丹霞炫兮釀春酒
塔下萱花對晴晝
紫簫清瑟間齊謳
衣綵高堂獻眉壽
人生此樂真良圖

奉親報國多清娛眼中富貴自有待身退功成遊五湖
倒騎青鸞過玄圃池上碧桃花滿路窄衣笑拍洪崖肩
醉看滄海珊瑚樹

宿黃州城下懷蘇仙

五雲宮闕芙蓉苑燭襯金蓮賜官宴翰林風月紫薇花
錦袍犀帶黃金硯一朝遷謫來黃州滿頭風雪寒飈飈
寒驢破帽秃雙鬢兒啼妻怒聲啾啾瓶無儲粟家四壁
斗酒誰換烏貂裘饑腸一字不堪煮清苦占斷人間秋

獨倚竹樓題短句酒入五腸肝膽露自揜布袖捲天風
繞壁龍蛇起烟霧九重忽報天恩來寒谷得暖陽春回
黃封御宴賜顏色賀客門迎車馬排朱輪皐蓋五花誥
赤霄白日登蓬萊人生得失有如此覆手為雲翻手雨
我因登眺撫江城歷歷東坡舊遊處臨登弔古不勝悲
落日滄波白鳥飛金馬玉堂天上夢茶烟禪榻鬢如絲

過南湖紫

城頭開船北風起帆輕直過南湖紫上水歡呼下水嗟

龍王廟前准燒紙小婦攀曾楊柳磯淮鹽換得鰕魚肥
沽來新酒不成醉卧聽鄰船歌竹枝

宿潯陽

潯陽城頭秋雁啼霜寒木落江霏霏孤舟晚泊日當酉
纜繫石橋楊柳磯庾樓基廢迷烟樹猶記樓船爭戰處
草店蕭條野客酤女牆依舊官軍戍逝水滔滔送落暉
繁華雲變不勝題當年司馬青衫淚翠袖琵琶夢已非

求陸伯瞻作懶雲莊圖

老來已矣房山逝江海丹青少奇跡故人胸次出神奇
寫法誰能識天趣倒翻墨汁金蟾蜍珊瑚翡翠相縈紆
遠樹浮青氣黯淡遙山疊翠烟模糊洞庭八月波如鏡
一片玻璃三萬頃白蘋香老雁啼霜九點蒼梧落秋影
煩君為寫懶雲莊樹根絡石苔連牆丹崖深處三間屋
坐弄紫簫書滿牀

送丁兼善還荊州

大邦維襄國門戶軫翼經躔分野次西帶巴樊控楚墟

東連吳會跨淮泗
凌雲宮闕麗中天
府下英豪總世賢
賓客那能珠履宴
簪纓未數玳瑁筵
行旌枉顧溪頭屋
瀟灑襟期慰幽獨
藍田玉相出奇姿
紫畹瓊蘭藹清馥
交情絕愛眼中稀
慷慨霏談不忍違
只恐王程軍務速
青雲荆樹馬駢駢

送春詩

珊瑚鈎搭黃金索
楊花香雪穿珠箔
綵雲蟠翠綉麒麟
宮衣初試羅衫薄
雉扇班移午漏遲
麝煤浮硯墨淋漓

筆掃粉箋龍影動殿頭新賦送春詩

蒲養堂為薦福天然長老賦

方丈前頭蒲葉細上人紉蒲織為屐拄杖挑雲過市西
換得香粳奉甘旨袈裟焚蘭還誦經慈顏怡怡雙鬢星
甕頭釀得春酒綠但願四時蒲葉青

繼善堂為萬得亨賦

漆經剝落蚪蚪沉孔壁已無絲竹音紅牙題籤鏤白玉
紫駝剪錦泥黃金幽篁三徑琅玕靜睡鴨焚香銷淑景

簾深粉壁白於霜，屈曲龍蛇掛秋影。故人好雅絕紛華，
右史左圖書滿車。眼看富貴浮雲外，宜爾子孫宜爾家。

案軒為江禮聞賦

平湖斜帶城東道，幽軒偃蹇長松好。琥珀脂凝露葉光，
茯苓出土雲根老。八月九月天氣虛，疎簾焚香公事餘。
秋風落樹山月吐，一榻清涼還讀書。

蘭軒為丁彥鼎賦

隱居草堂臨澹津，疎簾晝垂無市塵。青衫緇鬢寧辭祿，

白眼乾坤不厭貧，小窻斑竹闌干曲。
客來屐齒苔痕綠，緗帙連牀。
蠹影沉墨池，映硯鵝羣浴。
手種幽蘭滿後庭，紫莖芳穗延餘馨。
烟痕遠浥三湘碧，露氣遙分九畹青。
返掩衡門樂真趣，不向繁華逐桃李。
美人采結自有期，五雲環珮蓬萊水。

題滕王閣

珠簾畫棟當南浦，岸草汀花幾今古。
九江潮白雁橫秋，五老雲青龍出雨。
浩蕩滄波去莫回，淒涼唐室不勝哀。

空遺王勃文章在父老扁舟奠酒來

暑雨寫寄吳魯瞻

暑雨蒸晴沙草綠村北村南啼布穀掛書牛角學躬耕
老眼生花不成讀土牆柴門茅屋低糲飯過午行人稀
故園竹樹久蕪穢荒榛瓜蔓相因依却憶揚旌出沙漠
不忿旄頭射芒角骷髏飲酒帶血腥馬上單于雪

中縛

七夕對月懷藍明之黃彥美蔣師文先生

碧梧金井生早秋北斗斜射銀河流鵲橋靈車儼若渡
織女有約期牽牛古傳此事不可詰五雲髻髻聞笙球
褰衣舉酒酬明月起舞激烈心悠悠但恨玉兔搗靈藥
不能醫此萬古之間愁眼看明月年年好古人已先今
人老今人還是後人哀綠鬢朱顏豈堪保自憐年少心
志狂赤手直欲攀扶桑琅玕披腹扶雲漢擬致堯舜垂
衣裳豈無蒼生待霖雨命與時蹇空昂藏棄官歸來守
鄉土破硯凝塵百無補時今引領送飛雲天華當空秋

一羽今年種豆南山阿斜日荷鋤仍浩歌木葉脫落霜
露降時不我延將奈何明年擬結溪頭屋亂石環牆種
脩竹扁舟載酒弄滄浪看雪尋梅剡溪曲

耕讀生涯為子昇弟作

杏花開時啼乳鳩平野雨霽青烟浮稚兒呼犢出溝食
長蓑短笠登西疇布穀村南聲逐逐勸人種新食新穀
蛙聲知歲卜田頭龍骨聲閒卧沙曲九農鼓腹喜年登
穉穉連雲欣歲熟草塘低接榆柳牆柴門半掩歸牛羊

溪虛笛弄夕陽晚木脫風高秋露涼
窻下移燈把書讀
老翁燃松當短燭但願官家徭役平
雞黍年年會鄰屋
題趙文敏公墨竹為宋景濂學士賦

坡翁老可俱已仙誰寫石上青琅玕
淇園蕭條白日晚
渭水寂寞西風寒歸來三徑無人共
翡翠參差涼露重
瀛海終期釣六鰲緋山自擬棲三鳳
八月秋高夜向沉
長梢初拂生清陰千尋楚水三閭操
萬里天山屬國心
洞庭冥冥波浪急模糊爪甲蛟龍蹟
悵望天涯翠袖愁

一片湘雲淚痕濕

題雲濤兄歸來圖孫子林畫

老兄平生好音節北歷幽燕南適越手扶赤日濯龍淵
足躡層冰探虎穴泰華黃河眼裏空金殿瑤池夢中閱
掛冠歸來雙鬢疎白雲草閣山中居長鍾採杞朝春藥
短褐然松夜著書亥豕細研窮六籍魯魚深辨惜三餘
蒼頡無聲李斯死紛紜字劃蠅鑽紙龍馬圖從鳥跡分
螺螭法緣蚪蚪始朱研洮石露華新筆頽生花眼力昏

衣桁書晴凝麝馥墨池春暖浴鵝羣負郭墓田誰復種
長歌歲宴飛鴻送老硯深知百世傳殘書莫惜兒孫誦
却憶故人孫省郎丹青藝絕更無雙斯文已矣今何在
江漢淒涼思斷腸

送任侯赴京

華亭任侯來尹于鄙政明訟理田野安業今茲報
政朝廷而垂髻戴白之民依然不忍侯之去也
士大夫咸作詩以歌頌懷思之情焉詩曰凱弟君

子民之父母其斯之謂與

柔桑陰陰無附枝雲連麥穗秀兩岐兒童攔街晚騎竹
父母攜酒春寒帷犢車巡行樹邊憇土牆犬卧花陰細
野岸簾櫳夜讀書茅簷機杼秋催織我侯之澤民感之
三年報政民懷思我侯之德永無斃彭蠡湖邊勒貞石

醉漁詩葉楚庭求賦

醉漁少年多宦遊解鞍夜宿錢塘樓桃花馬繫珊瑚樹
蘭麝衣熏翡翠篝梨花開時風日美蘇堤畫船寒食儀

呼酒濯足嫌酒香醉倚玉人花影裏生涯自信黃公壚
避閒棹頭官不除垂竿滄海盟鷗鳥晞髮扶桑騎鯉魚
彭蠡湖邊閒弄月光範門前曾上書筆鋒殺盡南山兔
墨汁淋漓灑秋素崔嵬肝膽向誰傾悵望秋雲仰天哭
五湖為杯邱拍糟洞庭春色釀葡萄一醒一飲三千日
鼓枻中流釣六鰲

題都督沐公畫壁

唐稱王韋宋董郭元有高趙今俱無乾坤精爽久寂寞

素壁誰能開畫圖墨痕總是篆籀法但見元氣秋糝糊
長林蕭騷霜葉赤脩竹喬松幾千尺霧暖琅玕長碧腴
天寒琥珀流金液雲倚晴空華嶽青泉分曉澗天河白
路轉清溪楊柳疎籬落頗自幽人居當門大石面如掌
斜日坐來堪釣魚豈無樵歌伐木者最愛茅簷酌酒壚
攜書自可卧三島濯足因思歸五湖頗憐故宅鄱江上
對此茫然心獨往何日躬耕負郭田經年茅屋蒼苔長

燕子樓同陳伯寧賦

寶瑟凝歌繞珠箔流蘇結帶黃金索翠紅香裏宿鴛鴦
春風人間無此樂杏梁塵暗麝蘭篝黛鎖眉峯掩畫樓
燈殘枕冷梨雲斷秋雨人間無此愁

桃葉青

桃葉青青杏花吐樓頭吹笙教鸚鵡紅牙象板按梁州
金縷衣裳美人舞離情不似月常圓桃葉青青似去年
美人不來鸚鵡怨杏花零落畫樓前

烏夜啼練高同賦

城頭烏啼風瑟瑟露滴銀牀秋月白錦屏金屋醉西施
歌長漏短銅壺窄回首繁華散似雲姑蘇臺上鹿成羣
令人却憶烏啼月此月還應照後人

長相思高啓同賦

唱歌別君酌君酒出門不道離家久一日三時聽馬嘶
陌頭又見青青柳曉日游絲墮粉牆閨中啼烏人斷腸
鸞巾粉浥新年淚鳳枕情遺舊日香比翼鬢雲長自愛
合歡眉黛為誰粧經春魚雁無音信落花風急愁成陣

走馬常提白玉鞭封侯何用黃金印昨夜燈花照碧紗
定是行人當到家玉壺瀉香紅燭暖雞啼一聲嫌夜短

題敬義叔雲巢圖

山人讀書知者稀結巢棲息雲相依晴霏凝碧爽毛骨
夕露滴翠霑裳衣交柯溟濛覆枝葉攬秀長歌靜怡悅
夢入天風鸞鳳翔心悲夜月鷓鴣拙卷舒隨時情更閒
出岫時時戀故山濟時懶作天邊雨自得投林一羽安

田家樂寄張師孟

田家樂今年莊農好秋作蟄龍蛻骨枯棹懸五穀咸登
雨時若官家更憂民力疲公田折布能輕賈小姑攜筐
懶梳洗拾得棉花如雪肥大姑軋軋催機杼疎簾樹影
寒蛩語鬢雲籠霧颺西風眉月生涼褪秋暑山徑牛羊
下夕墟蕭蕭榆柳草堂虛野老杖藜邀小酌諸孫燈火
讀殘書

見月行

自憐少年不識月疑是明鏡飛上天但看三五二八夜

彎彎缺缺仍復圓悲歡離合每對此風雨陰晴經幾年
壯強已過今老大俯仰嬋娟不勝慨也曾對月客長安
蹇驢破帽西風殘砧聲蕭條夜向夕劍影錯落秋生寒
也曾對月秦樓夜春寒珠箔梨花謝金釵扶醉曉催雞
翠被留香暖餘麝也曾對月抱遺經燈火繩樞掩草亭
蕭瑟結冰寒走蠹芸窗露下晚收螢也曾對月榆關戍
百戰沙場士爭死金瘡卧馬瘴烟青玉帳磐雕陣雲紫
也曾對月泊瀟湘商賈淒涼野店荒菰米黑沉烏啄雪

柳條翠減雁啼霜也曾對月東華道影轉金莖閭闔曉
玉殿承恩出苑遲瓊林侍宴簪花早衰病歸來百不成
烟蓑雨笠學躬耕壯心寂寞吳牛喘倦翼彫零野鵲驚
每慚泛渚哀宏詠那復登樓庾亮情飛蓋清園歌已遠
乘舟赤壁夢何憑月色不殊人自改搗藥惟應兔長在
搴衣弔古倍增悲長跪臨風獻清醑朱顏易去不
復來一日一醉能幾迴昨日少年今日老且須置
酒登高臺桂花吹香白露下莫惜爛醉黃金壘舊

游豈無歌舞地銅駝白骨迷蒼苔前人已往今還
昔今人寧無後人憶後人復遣後人哀月落銀河
瀉空碧

鬼妾行

關中女兒白於雪縣官娶作專房妾黃金翠羽繡羅襦
枕邊誓死心不渝豈憶榮華草頭露好似青藤倚枯樹
一朝樹倒藤無依垂垂哀哭牽腸肚依稀無復半年春
新官到任遣媒人鴛鴦錦帳重還整鸞鳳金釵依舊新

洞房更結叮嚀語却說新情多勝故自念飛花逐水流
為憐嬌蝶無鶯妬傷心認著主衣裳窻前臨鏡照新粧
青銅欲待消磨盡幾度春風幾斷腸

金銅仙人辭漢歌周伯寧同賦

漢家黃金如土積鑄作仙人一千尺
緱氏山頭曉日紅
太一祠前露華碧
瑤漿凝彩剪雲澌
玉屑無痕浸寒液
安期日日候神仙
王母朝朝見鳧鳥
千門萬戶建明光
上苑南山繞柏梁
春滿甘泉千樹綠
波涵太液百花香

白麟朱雁呈祥瑞寶鼎芝房薦樂章詔遣青將驃騎
使通司馬拜中郎待邊親駐狼居外出塞兵藏馬邑旁
龍馬錦鞵來上谷葡萄銀甕出西涼李陵臺畔西風冷
蘇武坡前落日荒暮年始下輪臺詔思子宮前淚雙繞
壯志淒涼天下悲巡幸東從海上迴封禪無成還碣石
長生不復望蓬萊鼎湖龍去秋蕭瑟金鳧銀雁燈如漆
空遺弓箭慘無神青龍使者宮車出萬牛如山千里來
老淚裂眚銅仙摧前車未改後車轍昔人不盡今人哀

傷心秋草茂陵苑又見東風銅雀臺

迎春曲

燕梁綵飄金鳳喧翠衿小兒雙髻懸珊瑚鞭折金鎖掣
九地神牛飛上天東郊轆轤鳴紫犢綠蕪一片玻璃殼
柳眉桃臉紅霏霏東園蝴蝶西園飛

虞美人詞

萬人劍氣真羅虎寶玦鴻門悲亞父陰陵失道豈天亡
志輕仁義為降虜淒涼垓下楚歌哀玉碎花飛報危主

至今荒塚說虞姬一去繁華名不死君不見玉環香斷
九泉扁萬古滄波流不清

都陽五家集卷十三